

Bangunan KPU UMP Pekan Siap dan Bakal Beroperasi



Pekan, 1 Oktober- Bangunan Kompleks Pentadbiran Utama (KPU) yang merupakan nadi terhadap pembangunan UMP Kampus Pekan bakal beroperasi dalam masa terdekat. Serahan bangunan dibuat melibatkan pihak Jabatan Kerja Raya Malaysia (JKR) dan Pembinaan Jaya Zira Sdn. Bhd dalam majlis yang diadakan di Dewan Serbaguna KPU di UMP Pekan baru-baru ini.

Dengan penyerahan ini maka lengkaplah sebahagian misi JKR dalam menyelia empat Projek Pembangunan UMP Kampus Pekan melibatkan Perpustakaan UMP yang siap pada tahun 2011 dan UMP Fasa 1B yang disiap pada tahun 2012 manakala dua lagi iaitu Pusat Teknologi Maklumat dan Komunikasi (PTMK) dan Pusat Bahasa Moden dan Sains Kemanusiaan merangkumi Dewan Kuliah Utama juga telah siap pada bulan Julai dan bakal diserahkan tidak lama lagi.

Majlis dihadiri Naib Canselor UMP, Prof. Dato' Dr. Daing Nasir Ibrahim, Pengarah Cawangan Kerja Pendidikan, Ir. Shahruddin Shahril dan Ketua Penolong Pengarah Kanan bahagian Pengurusan Projek 7, CKP (Projek UMP), Ir. Radzuan Mokhtar, Ketua Penolong Pengarah Pendidikan Wakil Pegawai Penguin (Projek UMP), Ir. Abu Bakar Md. Sidek dan Presiden Syarikat Pembinaan Jaya Zira Sdn. Bhd, Datuk Baderisham Haji Jolly serta Timbalan Presidennya, Dato' Adi Munawar Hj. Md Din.



Menurut Ir. Shahruddin, projek KPU direkabentuk dengan inspirasi terjemahan elemen senibina yang mempunyai ciri-ciri eco sensitive design yang mengadaptasi konsep 'natural air circulation' dan 'Passive Solar Screen' yang menonjolkan reka bentuk permukaan bumbung yang besar membolehkan dinding berkaca yang optima dibina untuk mendapatkan pencahayaan semulajadi yang maksima.

"Elemen kubah sebagai struktur utama di ruang Pusat Pentadbiran iaitu Canseleri menonjolkan imej Kompleks Pentadbiran ini sebagai 'landmark' kepada pembangunan UMP secara keseluruhannya. Komponen-komponen lain bagi bangunan ini adalah Chiller Room dan Cooling Tower, Refuse Chamber, Pump House, Hose reel Pump Room untuk melengkapi sistem kemudahan bangunan bagi kebolehfungsian bangunan secara menyeluruh," katanya dalam menyampaikan ucapan.

Tambah beliau, projek ini juga berjaya dilaksanakan dengan menggunakan komponen Industrialised Building System (IBS) dengan skor 70 peratus. Beliau menegaskan kepada pihak kontraktor dan juga pegawai-pegawai JKR supaya semua aduan kecacatan oleh pihak pengguna di dalam Tempoh Tanggungan Kecacatan perlu diberi perhatian serta tindakan segera dan ditangani dengan cekap dan berkesan.

Sementara itu, Prof. Dato' Dr. Daing berkata, KPU menempatkan beberapa jabatan iaitu Pejabat Naib Canselor, Jabatan Pendaftar, Jabatan Hal Ehwal Pelajar dan Alumni, Jabatan Hal Ehwal Akademik dan Antarabangsa, Jabatan Penyelidikan dan Inovasi dan Jabatan Bendahari.

Katanya, sepanjang pembinaan berjalan berbagai isu telah dan terpaksa dihadapi antaranya perubahan rekabentuk kubah, penyiapan dan pemasangannya, isu cuaca yang di luar jangkaan dan pematuhan kehendak-kehendak Pihak Berkuasa Tempatan seperti Jabatan Penyelamat dan BOMBA Malaysia berkaitan kelulusan pelan bangunan.



Namun hasil kerjasama semua segala rintangan berjaya ditempuhi dan beliau berpuashati dengan komitmen semua pihak. Selain itu katanya staf akan mula berpindah secara berkala berkuatkuatkuasa 1 November ini.

Majlis turut dihadiri Timbalan Naib Canselor (Hal Ehwal Pelajar dan Alumni), Profesor Dato' Dr. Yusarie Zainuddin, Timbalan Naib Canselor (Penyelidikan dan Inovasi), Prof. Dr. Mashitah Mohd. Yunus, Pemangku Pendaftar, Abd. Rahman hj. Safie dan Pemangku Pengarah Kerja Jabatan Pembangunan & Pengurusan Harta, Marzuki Mokhtar.

Hadir sama perunding-perunding yang terlibat iaitu Zulshafii Architect selaku Perunding Arkitek, Perunding Global Prefab Sdn. Bhd. selaku Perunding Awam & Struktur, Jurutera Perunding Techique selaku Perunding Elektrikal, Elmec Consultants Consortium Sdn. Bhd. selaku Perunding Mekanikal, serta Contract Management Consultant selaku Perunding Ukur Bahan yang banyak memantau, menyelia, mengawal dan mengawas projek ini dengan penuh dedikasi sehingga ianya siap dengan jayanya.

Disediakan Unit Perhubungan Awam, Bahagian Komunikasi Korporat PNC